

## Nasional

# Kes denggi di KL membimbangkan

Warga kota diingat utama kebersihan, hapus jentik-jentik

Oleh Fahmy A Rosli  
fahmy.azril@bh.com.my

**Kuala Lumpur:** Kes demam denggi di ibu negara mencatat statistik membimbangkan apabila 6,695 kes direkodkan tahun ini setakat 23 Julai lalu, memabitkan enam kematian.

Angka kematian secara relatifnya agak tinggi berbanding lapan kematian bagi keseluruhan tahun lalu.

Pengarah Jabatan Kesihatan dan Alam Sekitar Dewan Bandaraya Kuala Lumpur (DBKL), Datin Dr Noor Akma Shabuddin, berkata pihaknya menjalankan pemantauan dan pemeriksaan secara konsisten tanpa mengira cuaca.

"Mengikut data setakat 20

Julai lalu, DBKL memeriksa 151 tapak pembinaan setakat tahun ini dengan 89 tapak ditemui menjadi sarang pembiakan dan 17 tapak ditutup.

"Setakat kelmari, sebanyak 666 tapak pembinaan dikompaun. Denggi bukan perkara baharu, tetapi masalahnya ada yang ambil mudah tanggungjawab mencegahnya.

"DBKL membuat pemeriksaan di tapak binaan secara berterusan setiap hari, selain kediaman yang dikesan merekodkan kes denggi," katanya ketika dihubungi BH.

Beliau mengingatkan warga kota supaya mengambil serius aspek kebersihan persekitaran rumah dan mencegah pembiakan jentik-jentik.

Sementara itu, Pakar Perubatan Kesihatan Komuniti Fakulti Perubatan Universiti Kebangsaan Malaysia (UKM), Prof Dr Sharifa Ezat Wan Puteh, berkata isu penularan pandemik COVID-19 dilihat memberi kesan terhadap kepekaan masyarakat mengenai risiko berlaku



**Sekarang ini masing-masing sibuk dengan COVID-19, seolah-olah tidak nampak siapa nak jaga masalah pembiakan Aedes ini.**

*Dr Sharifa Ezat Wan Puteh, Pakar Perubatan Kesihatan Komuniti Fakulti Perubatan UKM*

### KES DEMAM DENGGI DI WPKL



Bil.	Tahun	Jumlah kes	Jumlah kematian
1	2014	6,874	21
2	2015	8,057	35
3	2016	8,140	20
4	2017	7,797	18
5	2018	7,138	11
6	2019	14,356	8
7	2020 <i>(setakat 23 Julai)</i>	6,695	6

Grafik BH

penyakit berjangkit lain.

Katanya, COVID-19 sedikit sebanyak menenggelamkan kesedaran awam mengenai kewujudan atau bahaya penyakit lain.

"Sekarang ini masing-masing sibuk dengan COVID-19, seolah-olah tidak nampak siapa nak jaga masalah pembiakan Aedes ini.

"Rakyat tidak seharusnya bergantung kepada penguatkuasaan pihak berkuasa sahaja, sebaliknya perlu ada kesedaran mengenal pasti permasalahan yang timbul terutama di sekitar kawasan tempat tinggal.

"Mungkin kerajaan boleh lakukan sama seperti isu COVID-19 dengan mewujudkan sistem 'penggera' melalui pengan-

taran khidmat pesanan ringkas (SMS) atau program sebagai peringatan kepada rakyat mengenai status kes denggi.

"Ingatkan mereka kompaun akan dikeluarkan jika ada tempat pembiakan Aedes dan sebagainya.

"Sekarang pula musim hujan yang menyumbang kepada faktor air bertakung. Jangan tunggu penguatkuasaan daripada pihak berkuasa baru nak bertindak.

"Masing-masing perlu berperanan tanpa mengira sama ada ketua masyarakat, ketua kampung, imam dan sebagainya untuk cegah ancaman denggi," katanya.